

## 每週經課朗誦經文(巴克禮漢羅/教羅)2015/07/19

### 共同經課 - 1

#### 撒母耳記下七章一節~十四 a 節

1 當王 tiàm tī 厝內，耶和華也已經 hō伊脫離四圍 ê 對敵，得 tiòh 安靜 ê 時，2 王 kā 先知 Ná-tan 講，看 ah，我 tiàm tī 柏香柴 ê 厝內，總是上帝 ê 櫃 tiàm tī 帳籬內。3 Ná-tan 對王講，見若你 ê 心所想 ê，thang 去做；因為耶和華 kap 你 tī-teh。4 Hit 暝耶和華 ê 話臨到 Ná-tan 講，5 你去 kā 我 ê 奴僕大衛講，耶和華 án-ni 講，你 beh 起厝 hō我 khiā 起 mah？6 Tùi 我 chhoā 以色列人出埃及 ê 日到今 á 日，我 bē-bat tiàm tī 厝裡，常常行 tī 布棚 kap 會幕。7 見我 kap 以色列人所行到 ê 所在，kiám bat 對以色列一支派 ê 士師，就是我命令照顧我 ê 百姓以色列 ê，講，Lin 啥事無 kā 我起柏香柴 ê 厝 ah？8 Ta<sup>n</sup> 你 tiòh kā 我 ê 奴僕大衛講，萬軍 ê 耶和華 án-ni 講，我 tùi 羊寮中，你 teh thàn 羊群，揀你，做我 ê 百姓以色列 ê 君王。9 你無論去 toh 落，我常常 kap 你 tī-teh，tī 你 ê 面前剪除你一切 ê 對敵。我的確 hō你得 tiòh 大名，親像世上 hiah-ê 偉人 ê 大名一樣。10 我 beh 為 tiòh 我 ê 百姓以色列定 tiòh 一個所在，栽培 in，hō in tiàm tī 家己 ê 所在，無 koh 遷徙，兇惡 ê 類無親像早前攪擾 in，11 也無親像對我命令士師管理我 ê 百姓以色列 ê 日；我 beh hō你脫離一切 ê 對敵，得 tiòh 安靜。Koh 耶和華 kā 你講，耶和華 beh kā 你建立家。12 到你 ê 日子已經滿，你 kap 你 ê 列祖相 kap 暱 ê 時，我 beh 設立你所出 ê 後裔來續接你，我也 beh 堅固伊 ê 國；13 伊 beh 為我 ê 名起殿；我 beh 堅固伊 ê 國位，直到永遠。14 我 beh 做伊 ê 父，伊 beh 做我 ê kiá<sup>n</sup>。

### 共同經課 - 2

#### 詩篇八十九篇二十節~三十七節

20 我 chhē-tiòh 我 ê 奴僕大衛；用我 ê 聖油抹伊。21 我 ê 手 beh 常常 kap 伊 tī-teh，我 ê 手骨亦 beh 堅固伊。22 對敵 boē 能勒索伊；兇惡 ê 人 boē 能苦楚伊。23 我 beh tī 伊 ê 面前 phah 碎伊 ê 對敵；攻擊 hit-ê 怨恨伊 ê 人。24 總是我 ê 信實，kap 我 ê 慈愛，beh kap 伊 tī-teh；因為我 ê 名，伊 ê 角 beh 得 tiòh kiáh 高。25 我 beh hō伊 ê 手伸到海；Chiá<sup>n</sup> 手伸到 chiah-ê 河。26 伊 beh 稱呼我講，你是我 ê 父，是我 ê 上帝，是救我 ê 石磐。27 我亦 beh 設立伊最大 kiá<sup>n</sup>，做世上第一高 ê 君王。28 我 beh 為 tiòh 伊保存我 ê 慈愛到永遠；我 kap 伊所立 ê 約，的確無變換。29 我亦 beh 保存伊 ê 後裔到代代；Hō伊 ê 寶座親像天 ê 久。30 設使伊 ê kiá<sup>n</sup> 孫放 sak 我 ê 律法；無行我 ê 法度；31 悖謬我 ê 律例，無守我 ê 誠命；32 我就 beh 用拐 á 責罰 in ê 過失；用鞭責罰 in ê 罪惡。33 總是我的確無將我 ê 慈愛一盡對伊收回；亦的確無 hō我 ê 信實廢無。34 我的確無失我 ê 約，亦無改換我 ê 嘴所講 ê。35 我一 pái kí 家己 ê 聖潔來 chiù-choā，我決斷無 tùi 大衛講白賊；36 伊 ê 後裔 beh 傳教永遠；伊 ê 寶座 tī 我 ê 面前，親像日 ê 久長；37 亦親像月 ê 永遠建立；Koh 親像天頂確實 ê 干證。[Sè-láh]。

### 共同經課 - 3

#### 以弗所書二章十一節~二十二節

11 所以 lín tiòh 記得，lín 前照肉體做外邦人，hō hiah-ê 稱做割禮 ê 人稱 lín 做無受割禮，in ê 割禮就是 tùi 人 ê 手所行 tī 肉體 ê；12 hit 時 lín 無基督，以色列 ê 國無份，tī chiah-ê 應允 ê 約無干涉，無所 òng 望，tiàm-tī 世間 m̄-bat 上帝。13 Lín 平素離開遠遠 ê，ta<sup>n</sup> tiàm-tī 基督耶穌，tùi 伊 ê 血有得 tiòh 近 oá。14 因為伊是做咱 ê 和平，hō兩 pêng 做一個，拆去 hit 中間相隔 ê 牆，15 koh tī 伊 ê 肉體廢無結冤仇 ê 因端，就是 chiah-ê 誠命 ê 律法，記載 tī 規例 ê；beh tī 伊本身，將兩 pêng 造成一個新 ê 人，來成就和平；16 koh 已經 tī 十字架除去 hit-ê 冤仇，beh hō兩 pêng，tī 一體，tùi 十字架，kap 上帝和；17 koh 來傳和平 hō lín 遠 ê 人，也傳和平 hō近 ê；18 因為 tùi 伊，咱兩 pêng tī 一個神得 tiòh 親近父。19 Án-ni lín 無 koh 做外面人，寄腳 ê；就是 kap chiah-ê 聖徒 siāng 國，做上帝家內 ê 人，20 受起造 tī chiah-ê 使徒 kap 先知 ê 地基頂，基督耶穌家己做厝角要緊 ê 石；21 在 tī 伊見若所起 ê，lóng 相連絡，tiàm-tī 主來漸漸成做聖殿；22 lín 也 tiàm-tī 伊 sa<sup>n</sup>-kap 受起造，成做上帝用神所 khiā 起 ê 厝。

### 共同經課 - 4

#### 馬可福音六章三十節~三十四節、五十三節~五十六節

30 使徒聚集就近耶穌，將 in 所行所教示 ê lóng kā 伊講。31 耶穌 kā in 講，Lín 家己 kap 我來去曠野 ê 所在，歇暱 tiap-á-kú。因為往來 ê 人 choē，連食也 boē 顧得。32 In 就上船，去曠野 ê 所在，家己 toà。33 眾人看見 in 去，有 choē-choē 人知；就 tùi ták ê 城步行 sa<sup>n</sup>-kap 走，事先 in 到。34 耶穌出去看見 kui 大陣 ê 人，就憐憫伊，因為 in 親像羊無牧者；chiah 用 choē-choē 項教示 in。35 過去了，就到 Kek-nî-sat-lèk 地，船拋 tī 岸裡。36 已經離開船，人 liām-pi<sup>n</sup> 認得伊，37 遍遍走 hit-ê 地方；聽見伊 tī 甚麼所在，就將舖 á 扛病人到 hia。38 見若伊所入 ê 鄉社、城市、鄉下，in 將病人 hē tī 街市，求伊若 sái hō in 摸伊 ê 衫 á 裾 ê 鬚；見若摸 ê 人 lóng 得 tiòh 好。